

Seizdoeng Vuenyungz

幸福的冬天

Seizdoeng daeujdaengz, ndaw ndoengfaex gizgiz cungj dwg hausagsag, mou iq Gizgiz dam guhcaemz haenx mbouj bwh saekyiengh doxgaiq gvaq seizdoeng, baezneix de boihseiz lo! De gutgungq youq gungxgok ndaw rug, saenz-dedded. De naeuz: "Danghnaeuz gou bwh ndei gijgwn, bwh ndei lozfeiz, seizneix couh mbouj nit baenz yienghneix lo."

"Dung dung dung", sing roq dou cienz haeuj ndaw rwz Gizgiz, de siengi: Dwg byawz ha, mbwn nit baenzneix, byawz lij ok dou ha? Gizgiz geizheih dwk ganjvaiq bae hai dou. "Ndei lai lo, meuz iq Yenzienz daeuj lo, vaiq haeujdaej." Gizgiz itmienh gangj, itmienh au lozfeiz ndaw fwnz Yenzienz dawz haeuj ranz. "Raeuz bae sousib aen rug ba, sousib ndei le raeuz byoq feiz." Gangj guh couh guh, songde nyaengq ndaej hanh cungj lae lo, ndaw rug bienq seuq lo. "Ha, naengh gwnz mbonq seuqsak, byoq feiz raeujrub, geijlai vuenyungz ha!" Song boux de caemh sing gangj dwk.

"Dung dung dung", youh miz sing roq dou cienz haeuj ndaw rwz Gizgiz, de siengi: Baezneix dwg byawz ha, mbwn nit baenzneix, byawz lij ok dou ha? Gizgiz geizheih dwk ganjvaiq bae hai dou. "Ndei lai lo, ma iq Dwnghdwngh daeuj lo, vaiq haeujdaej." Gizgiz itmienh gangj itmienh au mienhbau ndaw fwnz Dwnghdwngh dawz haeuj ranz. "Raeuz bae sousib fuengzgnhaeux ba, sousib ndei le raeuz gwn mienhbau." Gangj guh couh guh, sam boux de nyaengq ndaej hanh cungj lae lo, fuengzgnhaeux bienq seuq lo. "Ha, naengh gwnz eij cingcaez, byoq feiz raeujrub, gwn mienhbau homfwd, geijlai vuenyungz ha!" Sam boux de caemh sing gangj dwk.

"Dung dung dung", youh miz sing roq dou cienz haeuj ndaw rwz Gizgiz, de siengi: Baezneix youh dwg byawz ha, mbwn nit baenzneix, byawz

lij ok dou ha? Gizgiz geizheih dwk ganjvaiq bae hai dou. "Ndei lai lo, lingz iq Bizbiz daeuj lo, vaiq haeujdaej." Gizgiz itmienh gangj itmienh au geij bonj saw gojgaeq ndaw fwnz Bizbiz dawz haeuj ranz. "Raeuz bae sousib aen ding ba, sousib ndei le gou doeg gojgaeq hawj sou dingq." Gangj guh couh guh, seiq boux de guh ndaej hanh cungj lae lo, ndaw ding bienq seuq lo.

"Doenghbaez, miz seiq boux baengzyoux ndei……". Gyoengqde naengh youq gwnz sahfab mou iq, byoq lozfeiz meuz iq, gwn mienhbau ma iq, dingq gojgaeq lingz iq, ndaw-sim cungj gag siengi, caeuq baengzyoux ndei doxcaez gvaq seizdoeng, mbouj couh dwg aen seizdoeng vuenyungz ndeu ha?

(Cangzah Si Funghsusanh Cungh-hangzcwnz Siujyoz Yoz Swghanz)



Gou Roengzrengz, Gou Cinbu

我努力,我进步

Singhiz gonq ngoenz singhiz sam, ban dou guh baez modaej Yinghyij gaujsi ndeu.

Mbaw sigenj fat roengzdaej, gou simgaenj yawj mbat he——92.5 faen! Gou laihnaeuz gauj ndaej haemq ndei, hoeng mbouj liuh daengz gaeng baiz daengz daengx ban daih 14 mingz lo.

Gou mbouj miz banhfap, ndawsim hojsouh lumj deng haujai non gaet nei. Gwnz sigenj baenz aen baenz aen ca nding, dwg geijlai lwenqda, geijlai coegda ha, couh lumj baenz fag baenz fag mid nding nei, cig camx haeuj aensim gou. Gou doiq swheij mbouj muenxeiq, youh lau deng bohmei ndaq.

Gwnz loh cuengqhag ma ranz, gou dungxcig mbouj onj dawz gij saeh neix cienzbouh lwnh hawj daxmeh nyi. Daxmeh mboujdanh mbouj gvaq gou, dauqfanj vah naek cingz laeg doiq gou naeuz: "Mbouj youqgaenj law, baezlaeng caiq roengzrengz!" Gou naiqnuknuk ma daengz ranz, haeuj ndaw rug bae, naiq lumj gaeqraq neix dak ninz gwnz mbonq.

Gou siengi bae siengi dauq, roxninh daxmeh gangj ndaej deng, cijmiz roengzrengz cij ndaej soundaej, gou hix yaek roengzrengz! Gangj guh couh guh, gou gaem hwnj saw Yinghyij doeg hwnjdaej, moix ngoenz lij guh geij diuz daez, yienghneix guh doiq daezsang cingzcik Yinghyij gou bangcoh gig hung.

Gvaq geij ngoenz le, youh miz baez Yinghyij gaujsi ndeu. Gou saenqsim cibcuk, cieq gvaq sigenj, yawjyawj le, raen genjdanh lai lo! Yienghneix couh dawz bit daej, vaiqvet dap daez.


Roekcib faencung le, sou sigenj lo, gou ndawsim miz daej dawz sigenj gyau hwnjbae. Banringz, lauxsae Yinghyij daej ndaw ban bauq cingzcik. Gou fwt simgaenj fwdfwd, ndawsim lumj miz ndaek rin hung he dimz gwnzde, lauheiq gauj ndaej mbouj ndei. "Daih' it mingz, Goh Gyahgyangz; daihngieh mingz, Cuh Yijhanz……" Sim gou mbat gaenj mbat soeng, cungsuengq dingqny i aen coh gou lo, gou dwg daihhaj mingz, beij baez gonq cinbu gouj mingz ne! Ndaek rin dimz gwnz sim gou hix cuengq roengzdaej lo.

Gienh saeh neix lwnh gou, mwngz roengzrengz geijlai soundaej couh geijlai, yied roengzrengz, soundaej couh yied lai!

(haj nienzgaep Cenx Cicwnz)

Gou Gyaez Fwn Doek

我爱下雨



Fwn doek, dwg gienh saeh gig geizmiuq ndeu. Fwn mizseiz lumj boux youz boihvunz ndeu, laeglemx daej, laeglemx bae; mizseiz lumj dah niq launyaenq ndeu, naj goemq baengzsa; mizseiz lumj boux cienghginh maenh' ak ndeu, daiq cien bing fanh max, cungfafa roengzdaej.

Ngoenzneix banringz, daxgoeng byaj ging-doengh daihdeih, gunglunglung, gunglunglung yiengi mbouj dingz, lumj boux lawz nyex huj de nei. Gvaq yaep ndeu couh fat beizheiq, fwjndaem deng hwk dwk lae raemxda. Gij raemxda neix ha, couh lumj roix caw diuz mae de ræk le, naed caw bada bada doek roengzdaej. De baez daej ha, couh mbouj rox dingz. Cijmiz go nywj, angq-fwngfwng, bek fwngz riu mbouj dingz, gyoengqde itdingh riu doenghij raemxda daj gwnzmbwn doek roengzdaej haenx. Biengzbeih caeuxcaeux couh ndoj haeuj ranz bae, deng hwk dwk mbouj gamj ok dou lo. Byalgw ndaw daemz yat ok naj raemx, lumj dwg okdaej coux naed caw hung lumj naed duh nei. Roeglaej manzgyaengi di ndeu hix mbouj roxsoq, deng fwn rwed lumj duz gaeq doek raemx nei le lij youq gyang fwn hemqcica, lumj yiengjsouh gij angqyangz dajcaemx gvaq nei.

Mbouj rox seiz lawz, fwn laeglemx dingz lo, gou byaij ok ranz bae, caeuq rumz iq doxdaemj. Fwn doek gvaq le, caen sangj ha!

(ngeih nienzgaep Vangj Loz)